



RAISONS DV PROCEDE' ET DE
la conduite du Grand Maistre Administrateur
du Cardinal le Moyne, à l'égard des Bour-
siers du mesme College.

*Avec un discours pour les prerogatives de la charge
de Grand Maistre.*



A charge de Grand Maistre du College
du Cardinal le Moyne a tousiours esté si
considerable, que^a des Euesques, des Pre-
sidents & Conseillers de la Cour, & d'au-
tres personnes de haute condition l'ont au-
trefois soigneusement recherchée, & ont tenu à grand
honneur de l'exercer, de la même façon que nous
voyons auioird'huy des Cardinaux estre Prouiseurs
de Sorbonne & de Nauarre, des grands Prelats &
des Communautéz les plus illustres dans l'Eglise & dans
l'Estat, estre Superieurs des Colleges de Laon, des Cho-
lets, de Montaigu & de Beauuais. Ce qui fait voir que
cette charge est tout d'une autre nature que ne se figu-
rent ceux qui la confondent avec celle de Principal de
College, ou de Prieur de Communauté de Boursiers, ou
de celui qui seroit (comme ils parlent) le premier
entre pareils.

En effet celui qui est pourueu de cettequalité de
Grand Maistre^b tient la place du Fondateur, repre-
sente sa personne, & ne reconnoit au dessus de luy-
en ce qui regarde l'administration de sa charge, que
le Roy & les Iuges ordinaires auxquels Messire Iean le
Moyne Cardinal Fondateur estoit soubmis; il est seul
Collateur ordinaire de toutes les bourses, il a le pou-
voir d'augmenter ou de diminuer selon sa prudence le
revenu des Boursiers, & de retrancher aux particuliers
le tout ou vne partie, s'ils viennent à manquer à leur de-

a Messire
Cosme
Clausse
Euesque de
Chaalons.
M. Pierre
Dorigny
President
aux Enque-
stes.
M. Simon
de Guiber-
ville noyen
& Chancel-
lier de l'E-
glise de Pa-
ris, &c.

b Statut
art. 3. 35. &
36.
Statut art.
6.
Statut art.
9.
Arrests 44
art. 40.
60. & 6. & 9.
de l'Arrest
du 7. Sept.

1605.
Statut art.
20. art. 40.
de l'Arrest
1544. & 2.
de l'Arrest
1605.
Statut art.
20. & Arrest
1544. art.
36. & c.
Art. 10. du
statut, &
Arrest de
1544. art. 13.
& de l'Art.
1607. art. 8.
& de l'Art.
du 9. Avril
1639. art. 7.
Statut
art. 21. &
Arrest de
1544. art. 46
& 8. de
l'Arrest de
1605 & de
l'Arrest du
9. Avril 1639
art 13.
* Par fon-
dation &
possession
immemo-
riale.

noir, il les peut visiter quand bon luy semble, corriger leurs fautes & abus, & proceder contre les mal-viuans iusques à la destitution de leurs bourses; il leur distribuë à chacun d'eux vne chambre à sa discretion, ils ne peuvent s'absenter du College sans sa permission, il preside seul aux comptes qui se rendent dans sa sale, & non dans celle du Commun, * nomme à la Cure du College; & ce qui rendoit encore autrefois cette dignité plus illustre, c'est qu'elle n'obligeoit pas ceux qui en estoient honorez de resider dans ledit College.

Mais cōme les Boursiers pendāt l'absence du G. M. n'obseruoient point les statuts, & faisoient vn mauuais employ des deniers prouenans du reuenu du College, la Cour de Parlemēt qui a toujours eu vn soin particulier pour cōseruer la splendeur de cette maison, ordonna en 1544. que le Grand Maistre y resideroit pour y maintenir l'ordre & la discipline par sa presence & par son autorité, elle luy assigna pour cet effet vn corps de logis dans le College, & en suitte quelque reuenu, sans luy rien oster des autres droicts honorifiques qu'il auoit auant que de resider.

Ce n'est donc pas d'aujourd'huy que les Boursiers de ce College en ont voulu dissiper le patrimoine, & resister à l'autorité de leurs Superieurs: mais si deslors leurs desordres ont donné lieu à la residence des Grands Maistres, ils en ont depuis excité souuent de nouveaux, pour les obliger d'en sortir, voyant que leur presence leur estoit vn joug insupportable qui les empéchoit de viure dans la mesme licence qu'auparauant.

C'est pourquoy de temps en temps il s'est fait dans cete Famille comme dans les Ordres les plus celebres de l'Eglise & de l'Vniuersité, vne espece de Reforme, & le Parlement mesme a depuis plus d'un siecle pris la peine d'en faire les Reglemens, & d'y maintenir ou d'y restablir la discipline par sa prudēce & par son autorité. Nous auons entr'autres le Reglement general fait en 1544. où dans la deputation qu'elle fit sur des Lettres Patentes du Roy de Messieurs de Quelin & Spifame Presidents aux Enquestes pour la reformation de ce College, elle fit

l'honneur au G. Maistre de l'associer à ce ministère: Reglement qui sembloit auoir rendu à la maison son premier éclat, & deuoir y maintenir à iamais la paix & la regle, si l'esprit de discorde, dont les Boursiers ont tousiours esté animez, n'eust preualu à la force de ces belles ordonnances, & obligé tout autant de Grands Maistres qui ont esté depuis, d'estre tousiours aux prises avec eux, soit pour se defendre de leurs trauerfes, soit pour les tenir dans les bornes de leur deuoir.

M. Leon Aubert qui auoit procuré cette reformation, & qui le premier des Grands Maistres a residé dans le College, n'a pas esté le seul persecuté par les Boursiers; Maistre Nicolas Beguin qui luy succeda en sa charge ne fut pas mieux traité que luy, il ne fut pas plustost Grand Maistre que ceux qui le regardoient auparauant avec estime & affection, le considererent comme leur plus grand ennemy, & luy susciterent des calomnies pour empescher qu'il ne residast dans le College, avec si peu de iustice qu'ils furent condamnez aux despens en leurs propres & priuez noms.

Mais l'aersion contre les G. Maistres residents estoit trop grande pour estre arrestée par ces peines, dont la Cour a coustume de noter les contestations temeraires. M. Pierre de Hodic successeur de Maistre Nicolas Beguin deuint l'obiet de leur haine, dès qu'il deuint leur Supérieur, & quoy qu'il eust obtenu contr'eux quatre Arrests de la Cour de Parlement des 18. Ianuier, 9. Fevrier & 20. Decembre 1565. & du 14. Ianuier 1567. ils ne laisserent pas de le traouiller par des vexations induës, iusques à ce qu'il eust quitté le College, & resigné sa charge à Maistre Estienne Laffilé, contre lequel peu apres ils s'efforcerent de susciter des personnes puissantes & interesees par de faux rapports & de friuoles accusations.

Et depuis peu, M. Edmond Richer Grand Maistre dudit College, a esté obligé d'obrenir vn grand nombre d'Arrests, & entr'autres en 1605. & 1607. des Reglements pour y remettre l'ordre qu'auoient ruiné les broüilleries que ses Boursiers luy auoient excitées.

Maistre Philippes Pourcel qui exerce cette mesme charge depuis dix-huict ans avec beaucoup de soins & de travaux, n'a pas esté d'une condition plus heureuse que ses predecesseurs, & par une fatalité presque inevitable à tous ceux qui ont gouverné cette Communauté, il a esté obligé pour l'interest de sa maison, par le devoir de sa charge, & par la necessité de sa defense, de soutenir une infinité de procez & de differens, dans lesquels il peut dire que son procedé a toujours esté si iuste, qu'il n'a jamais esté que defendeur, & sa defense tousiours si legitime, que le succez luy a esté tousiours avantageux.

De temps en temps il s'est rencontré des Boursiers de facheuse conduite, qui abusant de la facilité des autres, ont entretenu le College dans le desordre. M. Philippes Pourcel croyoit pourtant apres une longue patience & un combat de plusieurs années avoir estably une solide paix par le Reglement qu'il avoit obtenu de la Cour le 9. Avril 1639. & ne songeoit plus qu'à l'exercice des bonnes Lettres qui avoit autrefois rendu ce College un des plus celebres de l'Univerité de Paris, & dont le reestablisement parfait a tousiours esté son plus grand desir; il sembloit mesme avoir desja repris quelque chose de sa premiere vigueur par une aussi exacte observation de l'ordre & de la discipline Scholastique qu'il estoit possible en un College, où les Boursiers donnoient un si mauvais exemple à la jeunesse: Mais de si iustes desseins ont esté traversés par les Boursiers, & le soin que le Grand Maistre prenoit pour faire executer ces Reglements qui luy avoient cousté tant de peines & d'annees, n'ont fait qu'attirer sur luy la haine d'aucuns d'entr'eux, qui croyoient que pour estre Theologiens & Bacheliers, ils estoient dispensés de l'observation de leurs statuts & de l'obeïssance deuë à leur Superieur & Grand Maistre.

Et particulièrement deux considerations les ont porté à la licence & à la rebellion.

La premiere a esté, qu'ils ont creü que n'ayant droit par le statut que de demeurer neuf ans dans le College, qu'ils en devoient user comme font les soldats dans un

lieu de passage, où pour se remplir ils font vn degast & vne dissipation estrange sans se soucier de ce qui arriuera apres qu'ils seront sortis; de sorte que ny l'exercice des Lettres, ny le patrimoine des pauüres n'estoient considerables à de ieunes gens qui tachoient d'abolir l'vn, & de dissiper l'autre, & qui croioient qu'il leur suffisoit que la maison subsistast autant qu'ils y deuoient demeurer.

La seconde consideration a esté que comme ils se trouuoient fort bien dans vne demeure si commode, & qu'il leur fachoit fort d'en sortir apres leurs estudes faites suivant les statuts pour faire place à de pauüres estudiants qui leur deuoient succeder, ils ont taché de s'y conseruer le plus qu'il leur a esté possible, soit par des negligences affectées dans le retardement qu'ils ont malicieusement apporté à leurs estudes, soit par des rebellions ouuertes en refusant d'obeyr aux Arrests que la Cour a rendus encores depuis peu contre quatre ou cinq particuliers.

Le Grand Maistre au contraire qui est perpetuel, & à qui la gloire & l'interest de son College touche de bien plus près, a tousiours trauaillé pour étouffer ces deux grandes causes de toutes les diuisions, & si d'un costé il a esté obligé d'employer toutes sortes de moyës pour retenir dans les regles ceux qui estoient sous sa conduite, de l'autre il a esté contraint de liurer autant de cōbats qu'il a falu faire sortir de Boursiers apres leur temps expiré.

C'est particulierement cette derniere cause qui a produit le trouble arriué ces iours derniers: car sur ce que la Cour a tesmoigné par l'Arrest rendu le 23. Decemb. 1648 contre le nommé d'Amerual, qu'elle ne souffriroit iamais que les Boursiers iouyssen de leurs bourses plus long-temps que celuy porté par les statuts, le nommé Barbier qui auoit pareillement acheué son temps, s'est seruy de toutes sortes de ressorts pour se maintenir en sa bourse malgré le G. M. & le Parlement, les statuts & les Arrests.

C'est avec regret que l'on est obligé de dire que c'est luy qui a porté le flambeau de la sedition, esperant trouuer ses auantages dans le trouble & la confusion: & à cet effet ayant attiré quelques autres Boursiers contre le G.

Maistre, il luy a suscité de nouvelles persecutions & de nouveaux procez; il en a recherché les pretextes, entr'autres choses dans la construction d'un four que la necessité du temps auoit obligé de faire faire (comme si c'eust esté vne entreprise trop hardie & au delà du pouuoit du G. M.) & dans la reduction de la menſe commune aux termes des Reglemens de 1639. laquelle à la verité par des condescendances du G. Maistre s'estoit vn peu accreuë, autant que le reuenu du College le pouuoit porter, mais qui n'auoit pû ne se pas ressentir de la diminution que toutes les choses ont souffertes en ces derniers troubles.

Neantmoins M. Nicolas Huchon & Pierre Lalemant Boursiers & Bacheliers en Theologie, dont l'un est Sous-Penitencier de l'Eglise de Paris, & l'autre Professeur en Eloquence, & dont les sentimens estoient plus iustes & la conduite plus sage, s'employerēt pour moyenner la paix, & auoient mesme fait consentir leurs Confreres à vn accommodement en l'Assemblée ordinaire qui fut tenuë le Samedy 7. Aoust 1649. Et de fait, on auoit deputé M. Nicolas Hardy & Estienne Bœceau tous deux Boursiers pour en aduertir le G. Maistre, ce qu'ils n'ont pas fait, en quoy ils ont assez tesmoigné estre ennemis du repos & de la concorde.

Et certes cette proposition n'eut trouuë aucune resistance ny contradiction dans l'esprit du G. M qui ne souhaittoit rien plus ardamment qu'une bonne & solide paix, & elle eust esté bien-toſt arreſtée s'il y eust eu autant de sincerité dans leur procedé que dans le sien: mais Barbier & ses adherās voyās avorter leurs injustes projets par cette conclusion & cet accommodement, se porterent comme des desesperés à la derniere extremite de force & de violence, & pour étouffer cette proposition d'accord non ſeulement dès ſa naiſſance, mais dès le moment. qu'elle fut conceuë, le meſme iour Samedy 7. Aoust ils exciterent vn orage & vne tempeſte horrible dans le College, preſage des malheurs qui ont ſuiui, & des mauuais deſſeins que l'on formoit contre la perſonne du Grand Maistre.

A cet effet ils animent les plus ſeditieux ou les plus fa-

ciles de leurs Confreres, font venir Damerual, homme reconnu pour violent & pour peu discret, & qui pour auoir esté chassé du College par Arrest^a, estoit ennemy mortel du Grand Maistre : ils pratiquent des Escoliers, & entr'autres deux Picards de condition qui demeuroient chez Barbier, & qui estoient dignes d'un meilleur Maistre, se font assister d'une troupe de valets, & apres auoir adjousté la fureur du vin à celle de leur colere, au milieu de la nuit & du silence dans la profonde tranquillité qui doit regner dans vne maison destinée a l'estude, ils excitent vn grand bruit, font vn chariuari avec des poëles, des chauderons, & toutes les vtenfiles de cuisine, sonnent la cloche, iettent des cris & des hurlemens comme si ce iour là eust esté vn iour de Bacchanales, & cette maison là vne maison de desbauche ; Le voisinage, où il y a des personnes d'honneur, Ecclesiastiques, Religieuses & Seculieres, prend l'alarme, & demeure ou épouuanté ou scandalisé d'un tel tumulte.

a Le 23. Decembre
1648.

Cela ne fut pourtant que comme le signal & la preparation du combat ; toute cette troupe échauffée s'en vient vers l'appartement du Grand Maistre, qui auoit employé en vain son autorité pour calmer cet orage, & apres auoir proferé mille injures contre son honneur & contre le respect deu à la Cour, apres l'auoir souuent menacé de l'assassiner, & vomy plusieurs paroles seditieuses & vilaines qu'on ne pouuoit pas mesme entendre sans rougir au milieu des tenebres de la nuit, ils rompirent les portes de deux buchers où il y auoit quantité de meubles de bois appartenans au Grand Maistre, & en ayant tiré tout ce qui y estoit en reserue, ils en firent vn grand feu au milieu de la cour, & enfin se porterent iusques à cet excez d'insolence & de fureur que de vouloir forcer la maison du Grand Maistre pour aller exercer sur luy leur rage & leur cruauté, tirerent plusieurs coups de pistolets dans ses fenestres, tacherent de rompre sa porte à grands coups de buche & de hache, & d'y mettre mesme le feu comme des soldats qui attaqueroient vne place ennemie.

Cet horrible tumulte dura depuis les neuf heures du

foir iufques à trois heures du matin du Dimanche, & les vestiges du feu & des coups de hache en paroissent encore en diuers endroits pour convaincre les coupables.

Ce fut à la verité vn sensible déplaisir au Grand M. de se voir ainsi cruellement traité par les siens; & comme cet Empereur voyant entre ses assassins celuy qu'il auoit aymé comme son fils, receut vne plus grande playe dans le cœur de certe impieté, que du coup de son poignard; de mesme ce qui causa plus de douleur à Maistre Philippes Pourcel fut de voir soufleuer contre luy non seulement ceux que sa charge luy doit faire considerer comme ses enfans, mais encor parmy eux, ceux-là, qui, comme Boeceau, luy ont vne plus particuliere obligation de leur établissement & de leur fortune, qui ont esté domestiques de sa maison, instruits charitablement de sa bouche, & nourris gratuitement de son pain.

Dans cet excremité où il estoit reduit de souffrir vn si facheux attentat, ou de le punir pour ainsi dire, sur soy mesme, en perdant ceux qu'il auoit regardez comme ses nourrissons, la priere de ses amis, qui ne pensoient pas que sa vie fut en seureté parmy des furieux, & la consideration de l'honneur de sa charge qui luy est plus chere que sa vie, & dont l'autorité s'en alloit estre entiere-ment ruinée, si ce crime demeueroit impuny, l'emporterent par dessus ses inclinations particulieres, & l'obligerent à en faire informer & obtenir vn decret contre les auteurs & les complices de ces excez.

Si ce desordre n'eut simplement esté que contre la discipline Scholastique, il n'auroit employé pour le calmer que les remedes & la seuerité du College: mais s'agissant d'un crime qualifié & d'une violence publique, contre lesquelles la puissance des Lettres est trop foible; & d'ailieurs ayant affaire à des personnes que l'aage & la qualité rend exempts de la ferule & des chastimens dont on vse enuers des Escoliers, il estoit obligé de s'adresser aux Magistrats à qui la connoissance en appartient, sans attendre que l'attentat qu'on auoit entrepris sur sa vie eut esté tout à fait consommé.

Il n'yfa pourtant de ce remede si iuste & si necessaire
qu'auec

qu'avec beaucoup de moderation, ce fut plustost pour les corriger par des menaces, que pour les soubmettre à des peines, & l'espace de 18. iours qu'il fut sans mettre les decrets à execution, fait bien connoistre qu'il ne s'en estoit seruy que pour les obliger à reconnoistre leur faute, & rentrer en leur deuoir.

Au contraire, par vn aueuglement épouuentable, ils tirerent auantage de l'indulgence de leur G. Maistre ; ils insultent à sa douceur & à sa moderation, comme si c'eust esté mollesse & lacheté ; ils publient leur rebellion & leur violence comme des faits heroïques & des victoires ; c'est à qui tirera la plus grande gloire d'une action si noire , & vn d'entr'eux, qui se fait appeller le Capitaine, se laisse emporter à vn tel excès d'audace, qu'en presence de tous ses confreres assemblez pour remedier aux suites & aux consequences de ce desordre, que les plus sages commençoient d'apprehender , il se vante arrogamment d'en estre l'autheur , & menace de faire eucore pis : si les nommez Huchon & Lalemant blasment leurs violences & font des propositions de paix, ils sont rebutez par les coupables & traittez de faux freres ; on affiche des billets injurieux aux portes de la Chappelle pour intimider les foibles, & pour encourager les méchans ; toutes les nuits l'on tire force coups de pistolets sous les fenestres du G. Maistre, & eux qui sçauoient les decrets de la Iustice , & qui estoient aduertis tous les iours de reconnoistre leurs fautes, ou de se donner de garde, disent hautement qu'ils n'ont qu'un seul regret, qui est de n'auoir fait que la peur au G. Maistre , & de n'auoir dechargé leur colere que sur ses meubles & sur la porte de son appartement.

On laisse maintenant à iuger si l'indulgence du G. Maistre n'eut pas esté criminelle deuant Dieu & deuant les hommes, & s'il n'eust pas esté responsable au public de tous ces desordres s'il les eut soufferts dauantage par vne espece de cōniuece & de preuarication. Encor ne se fut-il iamais resolu à l'extremité des remedes si vne derniere violence ne l'y eut contraint, qui fut que le Samedy 21. d'Aoust, 15. iours après le premier tumulte, vne vingtaine de vagabonds & traisneurs d'espées, vinrent dans le College où ils furent introduits par Barbier, receus par Boeceau, & cependât qu'une partie se tenoit dans la court, & l'autre dans le grand iardin à la porte de derriere du logis du

*Contumacia cum
pernicie,
quam obsequium
cum securitate malunt. Tac.
4. Histor.*

G. Maistre, afin qu'il n'y eut aucune sortie par où il pût échapper; quatre d'entr'eux garnys d'armes à feux & d'espées, entrent dans sa maison, tirent d'abord deux coups de pistolets pour effrayer ses domestiques, se iettent aussi-tost dans la sale & dans la chambre où couche le G. Maistre, le cherchent par tous les lieux, & iusques sous le lit, déclarent publiquement qu'ils estoient venus pour l'assassiner à cause qu'il auoit des decrets contre aucuns des Boursiers, & si par vn grand bonheur il n'eut esté absent pour lors, il n'eut pas éuité la violence que ces personnes inconnuës auoient dessein de luy faire; Leur conducteur qui estoit Boeceau, & la collation qu'ils prirent en suite en la chambre de Barbier, fait bien connoistre par qui ils estoient attritez.

Maistre Philippes Pourcel en cette derniere extremité où il s'agissoit plus manifestement que iamais de sa vie & de sa charge, fit ce qu'il n'y a personne qui n'eut fait dans cette rencontre, & cependant il ne le fit qu'avec peine & avec regret, il ne le fit qu'après les pressantes sollicitations de ses amis, & après auoir consulté ceux par le conseil desquels l'Vniuersité mesme se conduit, il abandonna les coupables à la Iustice.

Que si l'on oppose qu'il y a eu de la violence dans l'exécution des decrets, l'on peut dire que toute la violence a esté de la part de ceux qui ont esté rebelles aux ordres de la Iustice, que lors que l'on pensoit en apprehender deux ou trois sans bruit, ils se sont barricadez dans des chambres, ont soustenu l'assaut, & fait des descharges de fusils & de pistolets, qui ne sont point des armes à l'vsage d'un College, & encores moins de Theologiens, & par vne resistance si preparée & si criminelle, ils ont bien montré qu'ils n'estoient pas innocens.

Et certes, il seroit bien estrange que l'on accusast de violence vne personne qui par des voyes ordinaires & permises defend sa vie & son autorité, pour excuser ceux qui au milieu de la nuit dās vn College ont excité vne seditiō plus que domestique, & attritez des soldats pour assassiner leur G. M. & qui osēt en venir aux armes pour soustenir leurs crimes; si ce n'est peut-estre que les personnes priuées ayent plus de droit de se plaindre de la violence particuliere qui leur est faite par des inconnus & des estrangers, que quand la violence est publique

& scandaleuse, & faite à vn Superieur par les personnes mesme de la compagnie qui luy est soumise, & parce que le crime est plus enorme, il merite d'estre plus fauorablement traitté & doïue plustost demeurer impuny.

L'affaire estant venue au Parlement, la Cour commist deux Conseillers pour se transporter sur les lieux, & receuoir les plaintes de part & d'autre, s'imaginant qu'il n'y pouuoit auoir que de tres-grands sujets de mécontentemēs qui pussent porter des personnes qui ont le tiltre de Theologiens à des excez si inouys. Mais cette visite de Messieurs les Commissaires ne seruit qu'à faire connoistre dauantage combien l'entreprise de ces seditieux estoit criminelle, veu que dans la chaleur d'une émotion toute recente, & dans la liberté qu'ils eurent de parler, ils eurent bien de la peine à trouuer quelque pretexte de plainte.

Sçauoir
Messieurs
Meliand &
de Quelin.
pour lors
de la Tour-
nelle.

Messieurs les Commissaires ordonnerent que les parties donneroient respectiuelement leurs memoires pour y apporter le Reglement que la Cour iugeroit à propos. Le Grand Maistre à qui la conscience ne reproche aucune chose, & qui ne desire rien plus ardamment que la fin de ce procez, pour trauailler avec plus de tranquillité & de courage au reſtablishement de son College, ne manqua pas d'y satisfaire dès le lendemain; & les Boursiers qui d'ailleurs font tant de bruit, n'ont pas encorourny de deffenses, quoy que cette Ordonnance soit rendue depuis plus de trois mois; & n'ont pas mesme encor voulu signer le procez verbal, qui est vne marque bien euidente de l'iniustice de leurs plaintes & de la foiblesse de leur cause.

Mais ils ont recours aux calōnies, qui sōt les seules armes des méchans & des coupables, & pour couvrir l'horreur d'une action si noire ils se sont seruy de deux-moyens fort artificieux.

Le premier a esté, que comme ils font plusieurs en nombre contre vne seule personne, & que chacun d'eux a ses habitudes & ses intrigues dans l'Vniuersité, ils ont publié par autāt de langues qu'ils auoient d'emissaires, des faussetez & des suppositions qu'ils auoient inuentées, qui ont pû faire quelque impression sur l'esprit du vulgaire, & de quelques personnes enuieuses & interessées, mais qui ne trouueront iamais aucune creance dans les esprits de ceux qui sçauent qu'il ne faut iamais condamner personne sans l'entendre; & sur tout afin

de reietter sur d'autres la violence dont ils sont conuaincus, ils font sonner bien haut vne capture de cinq ou six Theologiens dans vn College, comme si l'on se deuoit pas plustost considerer la qualité du crime qu'il ont commis, que celle du traitement qu'ils ont souffert, ou comme si la saincteté de leur demeure deuoit estre vn azile pour les coupables, & vn lieu fermé à l'autorité de la Iustice.

Le 2. moyen a esté pour diuertir en quelque façon la protection que le G. Maistre espere de la iustice de la Cour, de susciter contre luy des Puissances dont ils sçauent qu'il estime & respecte la grandeur & la dignité: ausquels pourtant il peut dire avec toute sorte de submission, que puis que Dieu & le Roy ne leur a pas mis entre les mains cette partie de la Iustice qui punit les forfaits, mais seulement à l'vn, le Gouuernement de l'Eglise, & à l'autre l'Empire des Lettres; c'eust esté peruertir l'ordre de la Police que de leur mettre le glaiue entre les mains, lesquelles d'autre part estoient liées par l'autorité souveraine du Parlement desia saisi du differend des parties.

Le G. Maistre neantmoins proteste hautement & croit qu'il a interest que le public sçache qu'il ne pretend pas decliner ou estre exempt de leur Iurisdiction en d'autres occurrences, & qu'il sera tousiours prest de leur rendre compte de toutes ses actions, à l'vn pour la dignité de sa Prelature, laquelle seule il considere en qualité de Prestre (& non pas la superiorité imaginaire du College dont on l'a voulu flater pour donner couleur à la surprise que l'on faisoit à sa Religion, & que l'interest de sa charge ne luy permettoit pas en bonne conscience de reconnoistre) & à l'autre pour la dignité qu'il possède dans l'Vniuersité à laquelle le Grand Maistre est attaché par toute sorte de deuoir & d'inclination, & par la charge de Principal qu'il exerce dans le mesme College.

Le Grand Maistre espere enfin, en attendant que la Cour iuge le procez, ou que les coupables luy fassent quelque sorte de satisfaction, que la verité preuaudra tousiours aux impostures de ses ennemis, & que les artifices dont ils se sont seruy pour la déguiser aux Puissances & au public, ne donneront aucune atteinte ny à sa reputation, ny à la Iustice de sa cause.